

oportet, nec gratia conceditur qualis requiritur, nisi mediatio accedit.

Secundum remedium est *presentia Dei*, juxta illud : *En ipse stat post parietem nostrum, respiciens per fenestras, prospiciens per cancellos. Cant. II, 9.* Ubi Ludovicus a Ponte, l. 5, *Exhort. XI, § 3*, ait : « Ac si illis diceret : Attendite, oculi, quid cernatis, et aures, quid auscultetis, et lingua, quid loquaris, et mens, quid cogites, et appetitus, quid appetas : quia ipse sponsus Deus stat post parietem nostrum, prospiciendo quid agatis, ut suo tempore reddat unicuique juxta opera sua. Quòd si hoc in singulis operibus dices, vix peccares. »

Tertium remedium est *examen quotidianum*, tam generale quam particolare, juxta illud : *In matutino interficiebam omnes peccatores terræ. Ps. c, 8.* Et : *Laboravi in gemitu meo, lavabo per singulas noctes lectum meum. Ps. vi, 7;* nam ab exordio diei proponendo, et in termino diei dolendo, pugna contra vitia et passiones conficitur : ubi tamen notandum quòd Cassianus ex Abate Serapione monet : « Quòd primùm vitiis robustioribus superatis, atque infirmioribus succendentibus, parabitur nobis absque ullo discrimine perfecta victoria; nec tamen putandum quòd principaliter quis contra unum dimicans vitium, et velut ineautus aliorum tela prospiciens, inopinato ictu facilius valeat sauciari : quod nequaquam fiet. Impossible namque est eum, qui pro cordis sui emendatione sollicitus erga impugnationem vitiū eujuslibet intentionem sue mentis armaverit, adversus cetera quæque vitia generalem quemdam horrorem et custodiam similem non habere. » *Coll. XV, c. 14.*

Quartum remedium est *cura se in minimis mortificandi*, nam : *Qui fidelis est in minimo et in majori fidelis est, Luc. XVI, 10;* de quâ re fusé tractat Nigrinus, *Opusc. de curâ minim.*, et Blosius notat : « Quando quis propter Deum sensualitati voluntatique propriæ, etiam in rebus minimis, reluctatur ac se mortificat, rem ipsi Deo magis gratam facit, quam si multos mortuos ad vitam revocaret. » *Instr. spir., c. 2,* post med.

Quintum remedium est *amor Dei et rerum spiritualium* :

verissima enim est illa Christi sententia : *Venite ad me omnes, qui laboratis et onerati estis, et ego reficiam vos... tollite jugum meum super vos... et invenietis requiem animabus vestris : jugum enim meum suave est, et onus meum leve. Matth. XI, 28.* Quid non facit dulce et leve amor amens in amante profano? amor divitiarum in mercatore? vanæ glorie in milite? Cùm ergo tales sint homines plures, quales amores, argumentatur S. Augustinus, quid miraris si ille qui diligit Christum, et qui vult sequi Christum, amando negat seipsum? » *Serm. 47 de div.*

Sextum remedium est *operibus* et non solis desideriis, effectu et non solo affectu, mortificationi incumbere. *Non enim auditores legis justi sunt apud Deum, sed factores legis justificabuntur. Rom. II, 13.* « Si quis dicat, inquit S. Basilius, ad componendas animi sui affectiones moresque rectè instituendos, sufficere sibi divinarum litterarum doctrinam, is similiter facit ut si quis disceret ædificare, neque unquam tamen ædificaret, et æs cudere, et quæ didicisset, ea in actum nunquam reduceret. » *Reg. fus., int. 7.*

PRAXIS HORUM REMEDIORUM.

SCHOLIUM. Ut præscripta modò remedia practicè efficacia reddantur, evitentur ex imperio voluntatis actus pravi et boni sæpe elicantur, quibus peccata etiam levia deleantur, vitia et passiones subjugentur, virtutes implantentur, intentio ad Deum rectificetur, unde tam potentiae quam sensus interni et externi in suo officio continebuntur, et, diminutâ concupiscentiâ, amor Dei prævalebit.

ADHORTATIO AD MORTIFICATIONEM.

COROLLARIUM. Qui ergo incipiendæ perfectioni studet, orationi et mortificationi studeat : *Vadat ad montem myrrhae, id est mortificationis, et ad collem thuris, seu orationis. Cant. IV, 6.* « His quippe virtutibus, ait ibi S. Gregorius, S. Ecclesia, vel una quæque anima munda efficitur : quia dum per voluptatum mortificationem vitiis reluctatur, et per sanctas orationes frequenter lacri-

mis abluitur, sordes lavat ut sponso placeat, cui pulchra apparere conatur. » Tunc enim *ascendet per desertum, sicut virgula fumi ex aromatibus myrrae et thuris.* *Cant.* iii, 6. Quippe juxta S. Bernardum, *Serm.* 59, *ex parv.*, confessionem semper debet comitari myrrha et thus, id est mortificatio carnis et oratio cordis: alterum enim sine altero aut parum, aut nihil prodest. Nam si quis carnem mortificet et orare dissimulet, superbus est et dicitur ei: *Numquid manducabo carnes taurorum, aut sanguinem hircorum potabo?* *Ps. XLIX,* 43. Item si oraverit et carnem suam mortificare neglexerit, audiet: *Quid vocatis me Domine, Domine, et non facitis quæ dico?* *Luc. vi,* 46. Et quia nullus nostrum est qui non secutus sit Adamum peccatum nullus sit qui eum pœnitentem et se mortificantem non sequatur. Nulla datur hic exceptio: seculares enim a studio mortificationis excusare se non possunt; nam si ad delinquendum invenire nōrint vires, modum et secretum, cur non *ad serviendum justitiae in sanctificationem?* *Rom. vi,* 19. Sunt in medio mundo qui latibula querunt et inveniunt, ubi corpus castigent. Quis prohibet eos cohibere sensus suos a rebus vanis? delicias arcere in cibo, potu, lecto, somno et vestitu? ac præcipue in sustinendo patienter adversa, quibus ciliis et flagellis mundus abundat? Nec etiam illi sunt excusabiles, qui sive intra, sive extra claustra sub prætextu sanitatis se ab omni mortificatione exemptos credunt; nam præterquam quod austera diæta plus sanitati quam vita deliciosa proficiat, uti probat Lessius *Opusc. de Valetud. conserv.*, notat Hugo a S. Victore: « Ecce diabolus physicam docet: ecce medicus factus est; de complexionibus loquitur, infirmitates diversas, si teneatur Religio, generari prædicat. Sed quare hoc? non ut mederi velit, sed ut occidere possit: non ut ægritudines curet, sed ut securius inferat mortem. » *L. 1 de Claus. an.*, c. 2. Certè vera quies non invenitur passionibus indulgendo, sed eas superando, et verè se abneganti a Christo ipso promittitur: *Centuplum accipiet et vitam aeternam possidet.* *Math. xix,* 29.

§ 105.

APHORISMI AD INCIPIENTES.

Denique, pro coronide hujus capituli et conclusione viæ purgativæ, ac pro utilitate incipientium, aliquot aphorismos, seu breves sententias comprehensivas doctrinæ hucusque traditæ et aliqua arcana viæ spiritualis, quæ ad incipientes at-

tinent, ex *Praxi Theol. Myst.* l. 1, c. 17 et 18, P. Godinez afferre utile erit. Sunt autem sequentes:

APHORISMI AD INCIPIENTES.

I. *Sacramenta, bona opera et diligenter recurrere ad orationem, via recta est ad perfectionem.*

II. *Flagellationes, cilicia et maceratio corporalis, sunt prima supellex ad initium vitæ spiritualis.*

III. *Incipiens qui aggreditur perfectionem sine magistro ad orationem, est navis sine nauclero qui clavum teneat, vel temonem.*

IV. *Frequenter frangere propriam voluntatem circa res minores, est animam ritè ad gratias disponere majores.*

V. *Devotionem obtinet conservatque mortificatio, cum quæ fervescit vel tepida quævis oratio.*

VI. *Devotio erga SS. Sacramentum et Mariam, via est et cibus ad perfectionis intentum.*

VII. *Qui nolit esse in oratione distractus, sileat interdum et ad interiora sit tractus.*

VIII. *Vestimento uti paupere et pannoso, stemma Christi est in pectore religioso.*

IX. *Modestia, condecoratio, pœnitentia et mortificatio ex corde procedunt, si amoris Dei habetur magna ratio.*

X. *Religiosus qui obediens non habet estimationem, monstrat esse falsam aut debilem suam perfectionem.*

XI. *Puncta prævideat et lectionem non omittat spiritualem, qui vult habere, ut oportet, orationem mentalem.*

XII. *Homo acerbus natura et asper indolis conditione, plus proficit pœnitentiâ quam contemplatione.*

XIII. Qui vult cœlestes speciales gratias recipere , eum superflua delicias oportet privatasque amicitias respuere.

XIV. Frequentet cum veniâ sacram communionem , qui velit perseveranter acquirere perfectionem.

XV. Nimium indulgere corpori et consulere castitati , est velle unire tenebras claritati.

XVI. Spiritu simul et carne deliciari miraculum erit , si queant adunari.

XVII. Imperfectus ex culpis animo cadit , perfectus verò ex culpis humilis et contritus evadit.

XVIII. Pudeat deliciosum et gulosum dicere se perfectionis et penitentiae studiosum.

XIX. Qui vult orationi studere , studeat primum silere et delicii non indulgere.

XX. Qui lectioni spirituali incumbit , Deus loquitur cum eo : qui autem orationi , loquitur ipse cum Deo.

XXI. Qui volet cum Deo largiter peragere , oportet parcè , nec nisi coacte cum hominibus agere.

XXII. Baculus est debilibus cordis teneritudo ; spirituali autem viro spiritualis lux est fulcrum et plena fortitudo.

XXIII. Qui velit ariditatem superare , oportet eum poenalia opera frequentare.

XXIV. Non est homo interior , affectatio quædam exterior ; nec modestia religiosa , compositio corporis artificiosa.

XXV. Quantumvis sit spiritualis interius , accommodet se ceteris , in rebus licitis , exterius.

XXVI. Crassè fallitur qui putat Sanctorum esse , immunditiae decorisque neglectui subesse.

§ 106.

ARCANA ILLIUS PARTIS VITÆ SPIRITALIS QUAE ATTINET AD INCIPIENTES.

ARCANA VITÆ SPIRITALIS PRO INCIPIENTIBUS.

I. Incipientes experiri solent plus devotionis , teneritudinis et lacrimarum , quam perfecti ; quia devotio sensibilis est caruca infantilis vitae spiritualis : et cum incipientes sint spiritu infantes , Deus eorum indulget debilitati , gratis hoc illis auxilio subveniens , ut et in viâ spiritûs hæreant.

II. Pueri et feminæ , dum devotione tanguntur , plus lacrimis et teneritudine fluunt quam viri , quia communiter naturâ teneriores sunt et moliores quam viri : quare humor ille quo abundant , oculis proximus , devotione sensibili facilis dissolvitur , liquefit et in lacrimas abit . Hoc naturale . At inspectum supernaturaliter , donum lacrimarum pars est devotionis sensibilis ; et cum illi opus habeant devotione sensibili , ut allcentur , accipiunt quoque donum lacrimarum quo deliciantur.

III. Incipientes devoti solent in virtutibus et propositis esse inconstantes , quia eorum virtutes bonaqua proposita fundari saepe solent in devotione sensibili , estque , ut plurimum , actualis gratia et transiens : sicque , fundamento hujusmodi deficiente , cadunt virtutes quae in illo nitebantur . Ideo quoque nimium devotus non debet votis ligari.

IV. Sanguinei solent esse devoti , animo generosi , obsequentes , dictoque audientes ; cholericî verò solent esse magnanimi et penitentes : quia haec virtutes magnâ sympathiâ respondent temperamento naturali , atque adeo cum gratiâ exercentur faciliter ; contra suum verò ingenium nemo consuevit esse virtute inclytus.

V. Novitii solent esse magis devoti, exterius compositi et minuti, quām professi antiqui; quia compositio exterior, quando affectata non est, oritur frequenter ab indole, vel a compositione internā et a devotione ac præsentia Dei: cū autem his abundant fervidi novitii, propterea isto modo compositè se gerunt.

Quando verò affectata est hujusmodi compositio, magna imprudentia est: declinat in excessum et omnibus fastidium creat.

VI. Novitii sunt magis scandalizabiles, quia deficiunt prudentiā, eaque propter, suam assumunt vitam in normam actionum alienarum, indeque mirantur valde quod alii possint ridere, colloqui, ambulare, comedere, aliter ac ipsi.

VII. Non pauci Novitii bonæ indolis potiorisque vocationis, a vocatione deficiunt 1º quia *multi sunt vocati, pauci verò electi;* 2º magistri non prudentes, qui nesciunt se in lictis accommodare illorum ingenio, in culpā sunt.

VIII. Mente habiles et oppidò intelligentes solent esse intra et extra orationem temptationibus dishonestis oppugnati; quia habilitas et sensualitas prævalent ex eodem temperamento naturæ, humido nimirūm et calido; ideo communiter mente habiles sunt viribus infirmi hāc in re: quanquam, ubi dæmon in causā est, non ligatur ad temperamenta.

IX. Sanctitas personata, quantumvis vera, solet periculosa esse, vel saltem suspecta, quia exterior est, plusquam oportet, plaususque popularis est virus humilitatis, sine quā nulla est vera sanctitas.

X. Viri spirituales conditione rustici et pinguis intellectus solent minus sancti quām spirituales cordati, prudentes et urbani, cū tamen non semel iisdem gaudeant exercitiis et statu: quia non quidem sita est sanctitas in hebete, acutavè mentis acie, sed in gratiā habituali et exercitio virtutum; quia tamen qui rudes sunt intellectu, suo tenui discursu ducti, has virtutes communiter exercent pingui similiter et vili modo,

sunt ut fabri ferrarii, qui, nimis cūm desudent, parum lucrantur: at spirituales mente strenui sunt, ut lapidarii gemmarum, qui carbunculum expoliendo, et parum laborando, centenarium lucrum reportant: quo etiam modo Sanctus aliquis mente præstans, laborando minus, lucratur ulterius.

XI. Indeclinabilis via ad æternam salutem est unumquemque implere quod sui muneris est et obligationis.

XII. Brevior ad perfectionem semita est amor divinus, patientiā contectus et humiliatione.

XIII. Vitium et peccatum se habent ut genus et species: omne siquidem peccatum est vitium, sed non omne vitium est peccatum. Constat in pueris ante usum rationis et amētibus, qui habent vitia, sed carent peccatis, ob defectum usū rationis et libertatis. Est itaque vitium defectus naturalis, peccatum defectus moralis; hoc enim provenit ex voluntate liberā, cum sufficiente malitia cognitione.

XIV. Quælibet actio quæ desciscit ab obligatione ac decentiā statū quem quis profitetur, erit imperfectio; v. g. distractio in oratione dicitur imperfectio; levare oculos leviter deficiendo a modestiā, verbulum pungens quod deficiat a charitate, otiosa prolatio cui deest finis aut necessitas, dicuntur imperfectiones. Quod si voluntariae sint, peccata erunt venialia: si involuntariae, non erunt materia confessionis.

XV. Sanctitas differt a charitate in eo quod sanctitas est gratia habitualis animæ substantiam informans; charitas est prima passio propria emanans a sanctitate ut ab essentiā suā. Sanctitate Deus practicè nos amat faciendo nos formaliter sanctos. Actus charitatis est nobilissima omnium dispositio, quæ adauget sanctitatem.